

Hana Younis, *Biti kadija u kršćanskom carstvu. Rad i osoblje šerijatskih sudova u Bosni i Hercegovni 1878-1914*, Univerzitet u Sarajevu-Institut za historiju, Sarajevo, 2021, 439.

Pitanjem šerijatskih sudova uglavnom su se do sada bavili historičari prava, međutim, radu osoblja šerijatskih sudova i njihovoj ulozi u svakodnevnom životu stanovništva pod austrougarskom upravom, do sada nije posvećivano pažnje. Dugogodišnji i temeljiti istraživački rad dr. Hane Younis rezultirao je objavom iznimno vrijedne monografije *Biti kadija u kršćanskom carstvu. Rad i osoblje šerijatskih sudova u Bosni i Hercegovni 1878-1914*, koja je u toku 2021. godine predstavljena široj naučnoj javnosti, a izdavač je Institut za historiju Univerziteta u Sarajevu.

Nakon *Predgovora* i *Uvodnog razmatranja*, autorica je tekst podijelila na četiri cjeline: *Šerijatski sudovi u Bosni i Hercegovini na razmeđu carstava*, *Rad šerijatskih sudova*, *Šerijatski sudovi kroz brojke* i *Osoblje šerijatskih sudova:kadije, vježbenici, pisari*. Autorica je prvu cjelinu *Šerijatski sudovi u Bosni i Hercegovini na razmeđu carstava* podijelila na četiri poglavlja. Prvo poglavlje, *Šerijat između Istoka i Zapada*, govori o pojavi šerijata zajedno sa pojavom islama, njegovoj ulozi u Osmanskom Carstvu, te na koji način se šerijat našao između Istoka i Zapada nakon Berlinskog kongresa 1878. godine. U preostala tri poglavlja autorica je istakla na koji način se formiraju šerijatski sudovi i kako je nova podjela teritorije koju je provela Zemaljska vlada utjecala na rad sudova. Osim toga predstavljen je i rad osoblja izvan sudskih prostorija, kao i kakva je bila uloga osoblja nakon austrougarske okupacije. Druga cjelina, *Rad šerijatskih sudova*, podijeljena je na tri poglavlja u kojima su predstavljene ovlasti šerijatskog osoblja pod novom upravom, kao i odnos stanovništva prema njima, ali je posebno poglavlje posvećeno i jeziku dokumenata šerijatskih sudova. Treća cjelina, *Šerijatski sudovi kroz brojke*, prikazuje rad sudova kroz godišnje iskaze koje su morali slati Zemaljskoj vladi. Četvrta cjelina, *Osoblje: kadije, vježbenici i pisari*, predstavlja predstavnike šerijatskih sudova. Autorica u ovom poglavlju govori o njihovom svakodnevnom životu, pravima i obavezama u periodu kada su se našli između dva carstva, ali i o odnosu Zemaljske vlade prema njima.

Autorica je ovom studijom dala značajan doprinos bosanskohercegovačkoj historiografiji predstavljajući svakodnevni život šerijatskog osoblja, kao predstavnika islama, u jednoj kršćanskoj državi gdje su oni bili njeni državni službenici.

Fikreta Jakubović